

四庫全書

子部

欽定四庫全書

冊府元龜卷六百三十二 宋 王欽若等 撰

銓選部

條制第四

唐武宗會昌元年五月中書奏州縣攝官假名求食常懷苟且不卹疲民其州縣闕少官員今後望委本州刺史於當州諸縣官中量賢劇分配公事勾當如官員數少力實不逮處即於前資官選擇清謹有能者差攝不

得取散試官充

二年四月制准太和九年十二月十八日勅進士初合格並令授諸州府叅軍及繁縣尉未經兩考不許奏職蓋以科第之人必弘理化黎元之弊欲使諳詳近者諸州長吏漸不遵承雖注縣官多靡使職苟從知已不念蒸民流例寢成供費不少况去年選格更改新條許本郡奏官便當府充職一人從事兩請料錢虛名吏曹正員不親本任公事其進士宜至合選年許諸道依資奏

授試官充職如奏授州縣官即不在兼職之限

五年七月制應在京百司官典優成授官人等既云趨
吏執舉簿書優成命官須居散秩近日僭越殊紊舊規
累資或至於登朝班序豈容於雜類自今已後如有改
轉官宜止於中下州長馬但不能登朝事貴得體永為
常式

六年五月制縣令員數至廣朝廷難悉諳知吏部三銓
祇憑資考訪於近日多不得人委觀察使於前資攝官

內精加選擇當具薦論如後犯贓連坐所舉人及判官
重加懲責

宣宗大中六年正月中書門下奏應天下令錄簿掾有
闕及見任見者改正委長吏舉其能者代之如舉之不
當請准前後勅殿其舉主從之

五月制吏部選格一曰縣令司錄錄事叅軍今任四上
考減兩選餘官得四上考縣令司錄叅軍得三考並減
一選二曰選人大功已上親連任停解如已得資者依

本官選數集未得資及未上並同非時選人例放選

懿宗咸通十二年七月中書門下奏准今年六月十二日勅釐革諸道及在京諸司奏官并請章服事者其諸道秦州縣官司錄縣令錄事叅軍或見任公事敗闕不理切要替換及前任實有勞效且見有闕員即任各舉所知每道奏請仍不得過兩人其河東潞府邠寧涇原靈武寧夏振武天德鄜坊滄德易定三川等道觀察防禦等使及嶺南五管每道每年除令錄外許量奏簿尉及中

下州判司及縣丞共三人福州不在奏州縣官限其黔中所奏州縣官及大將管內即任准舊例處分在京諸司及諸道帶職奏官或非時僉替考限未滿並却與本資官諸道節度及都團練防禦使下將校奏轉試官及憲御等令諸節度使每年量許五人都團練防禦量許三人為定不得更於其外奏請其御史中丞已下即准勅文條疏須有軍功方可授任自今後如顯立戰伐功勞者任具事績申奏如簡勘不虛當別具商量處分以

外輒不得更有奏請其幽鎮魏三道望且准承前舊例處分勅旨從之

僖宗廣明元年正月勅吏部選人粟錯及除駁放者除身名踰濫及欠選欠考並以比遠殘闕收注

哀帝天祐二年三月制曰設官分職各有司存銓衡既任於吏曹除授寧煩於宰執但所司注擬申到中書過驗酌量苟或差舛難可盡定近年除授其徒實繁占選部之闕員擇切當之優便遂使三銓注擬之間皆曠職

務且以宰臣所任提舉百辟唯務公平將致無私克臻
有道應天下州府令錄並委吏部三銓注擬中書門下
自天祐二年四月十一日後並不除授或有諸道薦守
量留據狀詳度可否施行庶幾各司其局免致繁隳宰
相提綱永存事體從宰臣所奏也

三年四月吏部奏比者格式申送員闕選人多有重疊
皆是兩人同到本道致使磨勘之際各有爭論蓋是選
人指闕之時妄稱事故銓司無因得知具狀須與注擬

如到任替闕叅差請准舊條殿選除此外如是格式申
送員闕仰且穩便去處請官不得更妄指射諸道假滿
拋官不到任不放上停官不赴任員闕及違程不及限
等員闕冀其畫一免悞銓司公事者制曰比者吏部注
官只憑格式送闕近以諸州不申闕解且從權指揮選
人指射之時既不詳審銓司注唱之際遂使交加頗屬
弊訛頻起論訟所司釐革合議允從

十一月制應合赴吏部常調選人等三銓公事素有條

流近年多不公平遂致授任重疊既聞爭競須暫停留
今者元帥梁王動靜推公周旋陳理或慮選人羈旅特
請准式施行兼緣已及深冬所司未有起請若或稽滯
必緩程期功在考詳務令精當今年冬常調選人宜委
三銓並准舊例處分如或踰濫輒違格文罪在官曹非
止猾吏其四鎮管內官員須候本道申闕到省方可注
擬

梁太祖開平元年四月勅開封府司錄叅軍及六曹掾

屬宜各置一員兩畿赤縣置令簿尉各一員

二年十月勅省諸道州府六曹掾屬只留戶曹叅軍一

員通判六曹

乾化二年三月丙申詔曰夫興隆邦國必本於人民惠
養疲羸允資於令長苟選求之踰濫固撫理之乖違如
聞吏部擬官中書除授或緣親舊處約或為勢要力干
姑徇私情靡求才實念茲蠹弊宜舉條章自今已後應
中書用人及吏部注擬並宜省藩身之才業驗為政之

否臧必有可觀方可任用如或尚行請託猶假貨財其所司人吏等必當推窮重加懲斷有司官長別有處分後唐莊宗同光二年三月中書門下奏糾轄之任時謂外臺宰執之官古稱列爵如非朝命是廢國章近日諸道多是各例官御使指州縣請朝廷之正授樹藩鎮之私恩頗亂規程宜加條制自今後大鎮節度使管三州已上者每年許奏管内官三人如管三州已下者許奏管内官二人仍須有課績尤異方得上聞若止於簡慎

無瑕徵科及限是守常道只得書考旌善不得特有薦
奏其防禦使每年只許奏一人並無尤異不得奏薦刺
史無奏薦之例不得輒亂規程更有將資官員請他處
除授請之橫薦最亂格文其已前事件如故違所司不
得輒與通進若奏下中書亦不在施行之限

是月中書門下奏賞善罰惡致理之源選才任能為政
之本所在刺史縣令有政績尤異為衆所知或招復戶
口能增加賦稅者或辨雪冤獄能活人生命者及去害

物之積弊立利人之新規有益於州縣為衆所推者即仰大處逐件分明開奏不得輒加緣飾以為浮詞據事狀不虛則加獎激以勸能吏如在任貪猥誅剝生靈公事不治為政怠惰具事節聞奏勘覈不虛當加譴罰以戒慢官其州縣官任三考滿即具闕申送吏部格式候勅除銓注本道不得擅差攝官輒替正授者從之

是月勅應南郊大禮六品已下行事官朕禋祀天地朝享祖宗百司各具其威儀郡吏遂蒙其置攝希因霈澤

以錄微勞然而躁妄之徒經求競進叅雜之道真濫莫分勘職名則半是冗員語人數則又盈千計若無簡舉便與寵榮不惟開僥倖之門兼恐撓銓衡之務須明條例方別等差應諸司行事官並付三銓各遣取告亦考牒解錄入仕歷子等磨勘如文書盡備只欠一選者便與依資注官欠兩選者與注同類官欠三選四選者與減一選欠五選至七選者與減兩選欠八選至十一選者與減三選一除未合入選門者許自同光二年

數本官選數滿日赴集其太常寺先以白身差攝本寺
官應奏祠祭勞考稍深者追取元額補牒簡勘不虛即
與正授如因大禮差補行事有前任官及出身者即須
准諸司例追告赤磨勘其諸色黃衣欠兩選者與減一
選應官資已高不合銓司注擬者亦委子細簡勘送名
中書門下如全無文書稱失墜官告勅簡勅甲又無證
據只有格式公驗并諸司諸州府公憑及試授官文牒
兼文書過格年月深遠者並落下所冀官無濫受恩不

虛行

四月三銓奏准本朝故事州府官員府置司錄叅軍外
有功倉戶法兵事六曹州有錄事叅軍亦置六曹縣置
令丞主簿各一員尉三員分判公事自後除兩京外都
督府及州置戶法二員餘四員並省縣置令主簿各一
員丞尉並省者伏以今年除本分合格選人外有郊裡
行事人數絕多伏見州官事簡掾曹請依舊兩員縣局
務繁佐官請添一員其間有尉無簿者請添置主簿一

員其赤畿次畿並請准此除兩京外其判司只置司戶
司法兩員從之

八月中書奏吏部三銓門下省南曹廢置甲庫格式流
外部銓等司公事並繁長定格循資格十道圖等前件
格文本朝敕立簡制姦濫倫敘官資頗謂精詳久同遵
守自亂離之後巧偽滋多兼同光元年八月車駕在東
京權判南曹工部員外郎盧重本司起請一卷蓋以興
復之始務切懷來凡有條流多失根本以至冬集起選

人并南郊行事官及倍位宗子共一千三百餘人銓曹
檢勘之時互相援引去留之際不絕爭論若有依違必
長訛濫望差權判尚書省銓左丞崔沂吏部侍郎崔貽
孫給事中鄭韜光李光序吏部員外郎盧損等同詳定
舊長定格循資格十道圖務令簡要可久施行從之

九月侍中郭崇韜奏臣伏見今年三銓選人并行事官
等內有冒名入仕假陰發身或卜祝之徒工商之類既
淄澠之一亂諒玉石之寧分蓋以偽朝已來蠹政斯久

猾吏承寬而得計非才行貨以自媒上下相蒙薰蕕同器遂使寒素者多遭排斥廉介者翻至湮沉不唯顯紊於官箴抑亦頗傷於治本近以注擬之後送省之間引驗而已有異同僭濫而果招論訟將敷至化須塞倖門臣欲請別降條疏特行釐革許其潛相覺察互有告陳若真偽之能分即賞罰之必舉應見注授官員等內有自無出身入仕買覓鬼名告赤及將骨肉文書楷改名姓或歷任不足妄稱失墜押彼公憑或假人蔭緒托形

勢論囑安排叅選所司隨例注官者如有人陳論勘鞫
不虛者元論事人特議超獎如未合格人或無名駁放
者便承偽濫人所授官資其所犯人下所司簡格處分
如同保人知保內有冒名濫進之謀亦許陳首若遞相
蓋藏被別人論告並當駁放其銓司闕頭人吏如被形
勢迫脅主張踰濫選人及自己不公亦許陳首並與放
罪若被人論告當行朝典兼恐見任官及諸道選人身
死多有不肖子孫將出身歷任告赤貨賣與人自今後

仰所在身死之處並須申報本州令錄事叅軍於告勅
上分明書身死月日却分付子孫兼每年南曹及三銓
停滯多及周歲致選人廣作京債經費倍多致其到官
必不廉慎此後至春來並須公事了絕若更逗留當加
責罰所有懼罪逃移者仰所司具錄名姓申奏請終身
勿齒兼牒本貫州縣各令知悉或有條疏未盡處仰所
司簡長定格別具條奏從之銓綜之司偽濫斯久識者
皆知不可承前未能卒除及崇韜條奏之後澄汰甚嚴

或放棄田閭毀抹告赤者十七八矣

議者以為惟新之始品物咸亨條奏

諸蠹來怨大作怒其苛察之甚

三年八月勅諸司人吏授官從來只繫勞考年滿赴選方許離司近日已來頗隳條制到司曾無考課公事尚未諳詳便求薦論深為佻倖遂使故事都失蓋繇舊人不存豈唯勞逸之罔均兼致司局之曠敗自今年除勞考滿三銓注官即許赴任非時不得奏薦如有注掌難重勞績可稱許本司奏聞當與減選或是顯然事迹在

司年深齒髮祇役不任即許解職赴任餘切依格條處分

四年二月左拾遺李慎儀吏部員外王松上表云諸道州縣皆是攝官誅剝生靈漸不存濟此蓋郭崇韜在中書日未詳本朝故事妄被間人獻疑點簡選曹曲生異議行矯枉過直之道成欲益反損之文其選人凡闕一事闕違並是有涉踰濫或告赤欠少或文字參差保內一人不來五保皆須並廢文書一紙有悞數任皆不勘詳

且自天下亂離將五十載無人不遇兵革無處不遭焚燒性命脫免者尚或甚稀文書保全者固應極少其年選人及行事官一千三百餘員得官者終及數十皆以踰濫為名盡被焚毀棄逐遂令選人或斃踣於旅店或號哭於行途萬口一詞同為怨酷臣等頃曾商議堅確不迴以至二年已來選人不敢赴集銓曹無人可注中書無人可除去年闕近二年授官不及六十乃致諸道皆是攝官朝廷之恩澤不行縉紳之祿秩皆廢銜寃負

屈不敢申陳列局分曹莫非僥倖且攝官只自州府多
因賄賂而行朝廷不知姓名所司不考課績皆無拘束
得恣貪殘及有罪名又不申奏互相掩蔽無迹追尋遂
使人戶流移州縣貧困日甚一日為弊轉多若不直具
奏聞別為條例不惟難息時病兼且益亂國章臣等商
量伏請特降勅文宣布遠邇明言往年制置不自於宸
衷此日焦勞特頒於睿慮兼以選曹公事情偽極多中
書條疏亦恐未盡望以中書所條件及王松等所論事

節并與新定選格有輕重未盡處並委銓曹子細點簡酌量但可以去其踰濫革彼弊訛不失本來

曹永例者務在酌中以為定制別具起請諸條從之

二月勅三川涇鳳秦隴等州縣官員數目極多其上佐官自少尹已下依本朝舊制各具見任員闕申奏其州判司准近制置錄事叅軍司戶司法叅軍各一員縣置縣令主簿各一員餘並停其出替選任一准三銓常式

明宗天成元年四月制曰力學登第承蔭出身或欠文

書浸成踰濫先遭抹毀幾至調選無人州縣多是攝官為弊滋甚宜令三銓別為啟請止除偽濫餘復舊規

七月樞密使宣旨使府判官州縣官告勅此後宜據道數進納仍令祇候宣賜者中書奏往例朝廷命官除將相外並不賜官告因偽朝條流凡准宣授官即特恩賜今使府判官皆許本道奏請或聞多在京師至於令錄悉是放勅後本官自於吏部出給告赤中書不更管係今若為點簡所授官吏器能欲令親承聖澤臣等商量

自兩使判官州縣令錄在京除授者即望令於內殿謝
官便辭赴任不便進納官告其判司主簿已下極是卑
秩不合更許朝對勅下後望准舊例處分從之

八月勅中書先條秦州縣令錄正衙後合赴內殿謝辭
者如令錄是除授者宜令給事中引對如是旨授准舊
例委三銓尚書侍郎各自引對仍須前一日閣門進狀
勅朕以方平區宇念切蒸黎頃當災歉之餘未絕瘡痍
之苦緬惟邦本實繫官常苟未致於雍熙則莫寧於宵

旣必在委於良吏付以親人儻縱因循轉成勞擾先朝以選門與訟剝放極多近年以來銓注無幾遂致諸道州縣悉是攝官既無考課之規豈守廉勤之節而况多因薦託苟徇顏情替罷不常送迎為弊殘民害物以日繫時言念所深焦勞何已宜令三京及諸道州府據見任攝官如未有正官到間且差月日錄名申奏如已後或為公事及月限已滿要行替換即須具因緣并選差攝官自來歷任姓名聞奏責免無故頻有替換如有內

外臣僚輒行薦託並不得應副儻聞違越當舉憲章

二年正月吏部郎中孔邈奏近見選人或以志在循陔
難違色養或以家同懸磬不辨衣裳致違調選之期遂
遇廢沉之例臣愚伏請自天成元年已前有出身分明
者悉許注擬況三蜀之內員闕極多俾出自於朝恩免
使希於假攝

三月銓司奏據南曹駁放選人累經銓及經中書門下
論接准堂判具新舊過格年限分析申上者伏以選人

或有出身或因除授各拘上例方赴調集多因遠地兵
戈兼以私門事故遂致過格固非願為新條標在七年
舊格容於千載臣等叅詳其選人過格年限伏請且依
舊格不問破優停集除本選數過格十年外不在赴集
之限奏勅宜依

十月制曰掄選之道雖在精研調集之勞頗聞艱苦應
選人內有過格年深無門叅選縱有材器難遂進趨宜
令三銓磨勘行止實曾兵戈阻隔即與今年冬集判成

選人例量材注官如或詐稱不在此限

十二月中書門下條疏應諸道選人等其中有過格年深無門叅選者准天成二年十月二十三日德音並委吏部南曹磨勘如實曾阻兵戈者許令注擬如或詐稱不在此限者凡是選人專思合格不肯固踰選限自滯身名縱阻干戈須在州縣應有過格人仰吏部南曹子細磨勘曾阻兵戈州府去處或曾假攝即有隨處文牒一一指實即便送銓司亦須詳先授告身攝牒及審驗

年貌方可注擬三銓注擬自有常規從前或有宰臣占
著好州縣員闕不令銓曹注授今年應是員闕並送曹
銓候移省之時若有好闕尚在必議勘尋其請託及受
囑人等當行黜責選人之內族類甚多經任之中資考
備在應南曹判成人等仰三銓各據逐人出身入仕文
書一一比驗年貌灼然不謬方與注官據長定格選人
中有隱憂者殿五選伏以人倫之貴孝道為先既有負
於尊親定不公於州縣有傷風教須峻條章自今後諸

色官員內有隱憂冒榮者勘責不虛終身不齒所有入仕已來告勅並封付所司焚毀奏勅宜依

三年正月吏部格式司狀申當司先准勅及堂帖指揮應焚毀告身勘同人及失墜文書等臣伏請重給告身令先與簡勅甲如無勅甲可簡即仰取同勅甲人告身勘驗同即與出給若是本朝授官及同光元年後授勘簡同即重與告身如是偽朝授官勘簡不虛即與出給公驗便同告身例處分者伏以再給文書實為難事有

司點簡務在周防當司近曾申堂請以合准指揮出給
告身公驗旋具選人出身歷任行止牒甲庫永為應驗
證明奉判准申者其所追取到選人授官勅甲或同甲
勅告身勘驗既同須准前指揮出給見有勅甲者便須
注出重給事錄年月日若不注破慮恐選人却將失墜
告身叅選刺驗勅甲既同文書浩大所司難為一一點
簡如是引驗同勅甲之人告身出給佗後却將失墜文
書選時甲庫又無憑應驗其同勅甲人告身欲於後面

連粘紙亦須使印批注仍牒報南曹要憑將來簡勘者
奉勅宜依所申仍具已出給告身公驗人數姓名開奏
將來更有合給者旋具申奏

五月二十一日勅先准同光三年十二月二十五日勅
北京及河北諸道攝官內有御署一任簡牒分明前街
先有正官告勅者便與據正官資敘依資授一任官其
無正官告勅者與授黃衣初任者其兩任三任已上簡
牒分明兼有正官告勅者與超資授一任官其無正官

告勅只有兩任三任簡牒者與授從黃衣第二任官各令取近罷攝任處州府文解便許非時赴選者前件攝官等當任使之際共副憂勤及開泰之期豈宜升降凡有先皇帝御署兼朕署攝簡牒每一任同一任正官赴選日依資注擬宜令北京及河北諸道州府知悉餘准元勅處分

是月中書條奏在朝庶官有託故停官者時日稍多即却與前官百司人吏合格者並從選未合格者逐司以

年勞奏薦只與勒留官凡百司長官月限將滿及已有
人替不得奏薦人使改補職次諸道薦人總與不可全
阻又難今後諸道節度使每年許薦二人帶使相者許
薦三人團練防禦使各一人節度觀察判官並留旨授
書記已下即隨府議者以為百司人吏只以年勞方得
赴選今許非時薦勞以勒留官為特恩即合格之日又
何為勞考哉雖使其司長將滿其奈教孫升木何此欲
止之而反啟之藩侯舉知俾資共理苟得其人多亦何

害如非其人患及黎庶又何以名器徇諸侯之請託而使賓佐即慮難守苟能守之即有知人之益矣

是月詔州縣官以三十月為考限刺史以二十五月為限以到任日為始

七月中書舍人盧蔭上言曰一同分土五等命官所以字彼黎民司其輿賦至於田租桑稅夏斂秋徵或旨限不愆或簡量增羨殊非異政乃是常程竊見諸州頻奏縣令多以稅輸辦集便作功勞諸道纔有表章朝廷已

行恩命且徵科是縣令之職分不過合望於甄酬若一年兩度轉遷則三載六昇階級併加寵渥慮失規程伏乞止絕薦論但稽課最即銓司黜陟自有等差貴塞倖門以循舊制奉勅盧詹職居近侍懇述大綱案州縣之規程重國家之恩命既為允當須示聽從

八月癸未中書舍人劉贊請令選人准舊制試判從之
九月右諫議大夫張延雍請令南曹引驗選人正身校其年貌從之

十一月勅禮部員外和凝奏應補齋郎並須引驗正身以戒冒名凡使蔭者云一任官得補一人今後改官頓轉品者即可如無嫡子即許以親姪繼院並念書十卷試可則補

是月吏部郎中何澤以流外官只考勞乞不試書判從之

十二月勅選門官吏訛濫者多自今後並令各錄三代家狀鄉里骨肉在朝親情先於曹印署納吏部中書門

下三庫各一本候得判印狀即許所司給付新簽告兼
本任官處及鄉里亦具一本納送州縣

四年正月大理寺奏近為陵令虛稱試銜簡法以詐假
論又據長定格選人無出身未曾任正員官使虛銜散
試官奏授正員官及權知權判等官未得資日以諸事
故解官並立選集限勅旨居官之榮其求甚重試攝之
任所得非輕徐究根源亦闕治道自亂離已來天下州
府例是攝官皆給試銜或因勸窮便闕詐假法中書雖

則不可選條內其奈不無爰當大定之期宜示惟新之道已前或有稱試銜者一切不問此後並宜禁止

五月詔曰凡在祿仕固有規程發身必藉於器能在任須彰於勞考否臧斯異黜陟並行朕自統寰區務均渥澤淹滯者皆期振舉勤恪者亦議旌酬既開進取之門遂有躁求之衆或不守選限捷路希恩或絕罷官資奔波取事侵有數之員闕屈無媒之選人以此比方宜各條理自今後應前資官有出身及兩除官並可依常調

赴選兼有莊宗并朕御署亦可准近勅赴選其一任除
官未入選緒若無定制難以進身宜約所守官資序高
低許令同有出身人合格年限求官赴京日仍須本道
申送則與除第二任官兩除後便准常調選人例如此
則事有區分人無奔競如藉才器非時昇擢不在此限
九月中書門下奏來年二月南郊大理應諸司寺監合
行事官伏以明德惟馨冀神靈之昭鑒作事謀始庶王
道之和平前件將來行事官等既預嚴禋希霑聖澤先

宜條貫免忤擬倫應合差行事官但是前資并及第黃
衣及三司徵科勒留官充仍逐司寺監先引驗歷任告
身分明則得差補若失墜文書則須得本處當時公驗
不得憑諸處所給憑繇如是州縣官須見四道五道已
上歷攝文牒皆是節察及直屬京防禦團練使差署乃
點勘逐任年月遠近曾親公事及得替因繇不是虛牒
則得收補其逐司合差職員官吏須是已經附奏者充
不得臨時旋出虛牒將來所司磨勘如不依元指揮公

然顏情互容謬妄其逐司官吏并本人並當勘責各行

嚴斷從之

初同光二年郊天諸寺監行事官千餘人不先引驗或以貨賂收補及行事畢銓注覆奏

率皆偽濫無憑時樞密使郭崇韜在中書宰臣豆盧革韋說等共議懲革奏請焚毀塗抹其告勅偽濫者五百人一時逃竄其文書不足者以駐京師終無所得皆相率慟哭而去士人側目以崇韜為詞然所行雖正夫於不先定格式引驗俾仕進者真偽自判也今宰臣所奏既行議者以為宜之

十月詔曰本朝一統之時除嶺南黔中去京地遠三年一降選補使號為南選外其餘諸道及京有司諸色選人每年動及數千分在三銓尚書繁重近代選人每年

不過數百何必以一司公事作三處官方況有格條各
作資考兼又明行勅命務絕阿私宜新公共之規俾慎
官常之要其諸道選人宜令三銓官員都在省署子細
磨勘無違礙後即據格同商量注擬連署申奏仍不得
踵前於私第注官如此則人吏易可整齊公事亦無遲
滯者

十一月勅應諸道見任州縣官司在任之時若時違犯
本道非時衝替宜却勒赴任考滿即罷其本判官當行

責罰

時藩鎮帥臣不識國體妄罷邑宰欲署其假官朝廷知之故有是命也

十二月戊戌勅其自陳狀乞除官者所賜告身並係特恩雖舊例令本官自出價錢慮不迫者稍難送納兼知本司人吏以此為名接便更致邀頡於官估綾羅紙價外廣索價數力及者隨時應副闕乏者須至淹延今後應是官告除准宣官破外其過伏乞除官并追封追贈敘封進封官告及舉人冬集綾羅紙縹軸錦袋等宜令並與官破仍勒各隨色樣尺寸如法裝修疾速書寫印

署進納

是月己酉勅應諸道州府令錄等官告勅牒元是中書
進納入內令閣門宣賜其判司主簿官告舊是所司發
遣受恩命後赴本任地里遠近各有程限比候進納恐
有停滯沉緩紙縹軸價錢近已官破今後所除州縣官
告身勅牒宜令中書門下指揮不要進納並委宰臣當
面給付責無畱滯兼免住京破費

是月勅應三銓公事宜准近勅指揮仍只使吏部尚書

印其東銓印並封宜付中書門下封送禮部權收管訖
申奏

欽定四庫全書

冊府元龜卷六百三十三

宋王欽若等撰

銓選部

條制第五

後唐長興元年三月勅凡是選人皆有資考每至赴調
必驗文書或不具全多稱失墜將明本末須示規程其
判成諸色選人黃甲下後將歷任文書告勅連粘宜令
南曹逐縫使印都於後面粘紙具前後歷任文書都計

多少紙數具年月日判成授某官懼其分假於人故也
又中書奏吏部流內銓諸色選人所試判兩節欲悉定
其等第久優者超一資其次者依資又次者以同類道
理全疎者於同類中人戶少處注擬從之

五月制曰獲遇拜郊遠來行事既施微効宜被優恩欠
一選者宜令待闕欠兩選者減一選欠三選四選者減
兩選欠五選六選者減三選欠七選八選者減四選欠
九選已上者減五選三司勒停官顯有過憊遂當停替

不逢大禮終是棄人仍令所司以罷官即選赴常調如是今年合格者許令待闕注擬仍委吏部南曹依元簡勘事節合減選數給付牒知

是月又勅凡命職官只憑告勅條流雖切認濫不無況來自羣方固非遍識除因章露始見罪尤先皇帝臨御之初郭崇韜制置甚切雖加峻法尚有訛風誠由本朝多事已來偽室偷安之際皆隨往制莫識嚴規秩高者以蔭緒假人廣求財貨吏狡者以貪恠得志不顧憲章

遂致傳授身名分張告勅勘初任則多稱失墜論資考則只有公憑前後相蒙真偽莫辨若不特行釐革無由永絕根源宜令自此應除授選授州縣官引驗磨勘須召有官三人保非謬妄則奏擬仍於告身內豎出保官姓名據本官所通三代名銜有出身無出身歷任告勅文書并逐任考數若是本朝及偽朝所受者並只於將來新告身內一一收豎其文書納留不再給付如自中興已來歷任待受新命後都粘連繳尾具道數委吏部

使印背縫郎官於狀尾押署給付或有失墜即須於所
失處州縣投狀具三代名諱及出身歷任請公憑赴京
勘會甲庫同即重與出給如公然拆破印縫不計與人
不與人將來求事並令焚毀其人當行極典自茲凡受
新命並依此例施行其見任内外文武朝臣及諸司職
守諸道州府判官并軍州職員有曾為州縣官及曾改
名所受本朝及偽署官告勅牒歷任文書亦並須送納
入官只以中興已來文書敘理其見任州縣官及諸色

前資官守選官等所歷任文書亦仰速便送納委所司
點勘無違碍則准前收監給與公憑任赴將來求事叅
選其秦王茂貞墨制官員並須得本道識認具歷任申
奏所司簡勘不虛亦給與公憑將來隆資受官所貴凡
是身名免有混雜仍限一週年內改正了絕其興元已
西應曾受偽蜀官員緣地里遙遠許勅到後一週年為
限仍各於本罷任處州府投狀具三代名諱出身歷任
一一分析申奏到日點勘准前指揮如出限外縱有申

送到文書並不敘理兼諸道亦不得以此身名奏薦如
違罪在本判官其本人別行嚴斷庶得新恩迥異舊弊
永除表為君一統之基塞入仕多端之倖仍付所司

七月吏部南曹奏磨勘南郊行事官前守濮州范縣主
簿李範是同光三年不納告身人數准勅終身不齒今
又冒名於四方館行事前河南府長水縣主簿趙知遠
使兄為父蔭行事者勅指李範已該恩赦特放罪收納
文書趙知遠以兄為父未之前聞既遇郊禋特從恩宥

出身歷任文書付所司焚毀放罪勒歸鄉貫本道長吏
與改昭穆奏聞其餘南郊行事合減選人數候將來選
限滿日宜並不取逐處文解不更經南曹點簡赴銓注

擬

時中書選部磨勘甚精進
者真偽明白人皆便之

九月勅諸道奏薦州縣官前銜內有賜紫金魚袋者若
循常例州縣官十六考方得敘緋若已佩金章固難為
令錄此後天下州府不得奏薦著紫官員為州縣官

是月前興唐府寇氏縣尉楊知萬經中書陳狀稱光化

三年明經及第其後選授官兩任莊宗郊天年於將作
監內行事禮畢擬授太子通事舍人旋直錯豎父母年
幾駸落其年丁父憂至天成二年又丁母憂去年九月
方服闋今春欲赴郊天行事又緣貧困無財可辦今乞
引驗已前文書量賜陶鑄者中書簡到同光二年行事
案楊知萬謬通父母年幾停落勅旨楊知萬實曾行事
尋已注官只為父母轉年恩命遂寢外別無違碍自後
相次丁憂久住京城誠宜傷愍宜令銓司點簡歷任文

書准非時選人例處分或前資官中有與楊知萬事狀相類者並准此指揮

十月吏部南曹闕試今年及第舉人進士李飛等六十九人內三禮劉瑩李斐李銑李道全明筭宋延美等五人所試判語皆同尋勘狀皆稱晚逼試偶拾得判草寫淨實不知判語不合一般者勅旨貢院擢科考詳所業南曹試判激勸為官劉瑩等既不攻文合直書其事豈得相傳橐草侮瀆公塲載究情跡實為忝冒及至定期

覆試果聞自懼私歸宜令所司落下其所給春闕仍各
追納兼放罪許再赴舉兼自此南曹凡有及第人試判
之時切在精專點簡如更有效此者准例處分

是月中書奏吏部流內銓諸色選人先條流試判兩節
並委本官優劣等第申奏文優者宜超二資注擬其次
者以同類官注擬所以勵授毫之作亦不掩歷任之勞
其或於理道全疎者以人戶少處州縣同類官中比擬
仍准元勅業文者任徵引古今不業文者但據公理判

斷可否不當罪在有司兼諸色選人或有元通家狀不實鄉里名號將來赴選者並令改正一一豎本貫屬鄉縣兼無出身一奏一除官等宜並不加選限從之

是月勅先條流見任州縣官及前資守選官所有歷任文書委所司點勘無違碍則准前收豎給與公憑任將來叅選者訪聞諸色選人有今年合格者因請公憑又淹京闕若候本道請解即須來歲授官多是甚貧誠為可憫况已及選限固取本任文解不及前件選人今年

合格已請得公憑者宜令吏部南曹准今冬選人例簡
勘施行如是欠選者候選數足日准格取本任文解赴
集

十二月太常丞孔知邵奏諸道行軍司馬副使兩使判
官已下及團練軍事判官並請依考限欲滿一月前本
處聞奏朝廷選替補授勅旨從之兼上佐官令錄判司
主簿等亦准此指揮或有丁憂及不赴任因事停官拋
官兼身死並具月日申奏如不依指揮罪在本判官

二年正月吏部南曹奏前齊州臨邑縣令趙諲等十人
納到歷任文書合給公憑勅旨其換給公憑仍令所司
以綾紙收豎取本行尚書侍郎列署出給其先已出給
者宜候將來赴選之時依此重給

是月勅少尹上佐以二十五月為限其府縣官宜准長
定格以三十月為限其行軍司馬節度副使判官等並
元未定月限勅旨諸道行軍節度副使兩使判官已下
賓僚及防禦副使判官推官軍事判官等若詢前代固

有通規從知咸自於弓旌錄奏方頒於綸綍初筵備稱
確畫斯陳朝廷近以旌賞勲勞均分員闕稍或便於任
使不免須議勅除既當委以裨贊所宜定其考限前件
職員等宜令並以三十月為限如是隨府不在此限

四月勅舉選人衆例是艱辛曾因兵火之餘多無勅甲
不有特開之路皆為永棄之人其失墜春闕冬集者宜
令所司取本人狀當及第之時何人知舉同年及第人
數幾何如實即更勘本貫得同舉否授官者亦先取狀

當授官之時何人判銓與何人同官上任罷任何人交代仍勘歷任處州縣如實則別取有官三人保明施行五月中書奏吏部南曹狀申准勅換給諸色官員告身公憑伏緣點簡選人歷任文書其間多有格後違礙事節若旋具姓名申覆伏恐漸積人多互起陳論交慮壅滯當曹不敢施行者中書據南曹所申事節逐件條流如後一件據申選人納到今任文書多於解繇及歷子內批書考第准天成四年四月二十一日勅新格已前

即許施行自新格已後亦多有解繇歷子內批監考數
本處元本給到考牒格前特許施行甚為優假格後更
聞違越須重條流今日已前有此色選人宜且與收監
此後選人如有解繇及批得歷子分明無考牒者殿一
選有得歷子無解繇考牒殿兩選如只有解繇考牒不
批得歷子殿三選如無三件文書便同有過停官一件
據中應諸色選人新格下後批歷子後時者五年後批
者不在磨勘之限今有格前罷任及新格下後罷任者

格下經六年七年方批入仕歷子或有全不批歷子只
給到公憑今日已前有如此者特與磨勘施行此後纔
罷任一月內須批給得解繇歷子違過一月殿一選過
三箇月不給批得者亦同有過停官一件據申應諸色
承應出身及童子及第例是擡年及陷歲數兼幼補身
名引驗之時多有差異者今日已前有此色選人並須
引驗辨認兼召保官委是正身別無謬妄則與改正詣
實年幾施行此後更有此色身名並同謬濫處分一件

據申河北諸色官員納到告勅文書例稱本處無不校
考只有解由河東河北及鳳翔已西不知選格須明告
諭仍令吏部南曹各一本解繇考牒解狀式樣徧下逐
處此後並須文書備足免誤選人如今日後公然更有
違越並准前殿選今日已前不在此例一件據申諸色
前資官告身今任入仕歷子或批到上任月日或是有
名假故批歷子處多無觀察使及刺史具銜押署只有
錄事叅軍批署者逐處長吏自此後並須依格文押署

如故違者本人殿兩選其今日已前違程式者且宜特與磨勘收監一件據申諸色官員歷官兩任至五任今任文書備足內有一任至兩任失墜前任解繇或考牒歷子又無公憑及稱元不給得即別有公據自此但知認中興已來所授告身為定其已前或有歷任稱失墜如是傳授他人有此糾告及所司點勘彰露並准累行勅命科罪今日已前失墜考牒解繇歷子如有公憑者亦與收監又無公憑將來選時降資注官自此後選人

更有失墜則須却於本處具所失因繇重具批給如違
准前殿選一件據申選人有今任文書備足只歷子內
批到上任月日即別有解繇或公憑文書證據分明自
今已後宜亦准前項指揮收整此後更有此色選人並
同有過停官例處分右奉勅宜依吏部南曹具此分明
曉告及徧下諸道州府應是選人各令知委如守官滿
日未給得解繇歷子等文書隨處不得便令辭謝如逐
州府輒有邀難不便出給罪在本判官并錄事叅軍

七月勅諸道奏薦州縣官各定員數今宜增益以廣搜揚使相先許一年薦三人今許薦五人不帶使相先許薦二人今許薦三人直屬京防禦團練使先許薦一人今許薦二人念應舉之流甚艱難於取事當及第之後尚迢遞於授官小而得簿尉者全稀老不為令錄者極衆即不得薦新罷任及諸格之人如未曾有官即許奏初官已有官者當別比擬吏部南曹奏前守鄆州盧縣令李玘歷任內兩任秘書丞一任國子毛詩博士雖前

任有昇朝官伏緣今任官合准格五選集候選足日取
解赴常調勅旨州縣官帶侍御史殿中侍御史內供奉
監察裏行及省銜者皆非正秩尚出銓曹况曾三度昇
朝豈可一例守選所宜振發以勵操修應州縣官內有
曾在朝行及佐幕罷任後准前資朝官賓從例處分其
帶省銜已上并內供奉裏行及諸已出選門者或降授
令錄者罷任日並依出選門例處分不在更赴常調便
與除官兼州縣官其間書得十六考者准格敘加朝散

階准出選門例處分如不書得十六考雖已過朝散階
不在此例

八月勅諸道奏薦州縣官前衙內有賜紫金魚袋先於
長興元年有勅州縣官若循常轍十六方得敘緋儻或
已佩金章固難却為令錄必若藉其才器則可別任職
資文資官結銜內已有金紫尚不許薦為州縣官其武
職銀青階亦宜條理諸道詳文資賜紫例不得奏為州

縣官

是月詔百司職史應選授外官者考滿日並委本州申
奏追還本司依舊執行公事

九月前溫縣令杜同文獻時務長吏年七十已上者請
不除令錄其合格應選者請授散官勅旨耄年為政蒞
事或有昏蒙老成之人安知不可師範宜令銓司此後
有全不任待者即別以優散官資注擬

十一月勅闕員有限人數常多須以高低定其等級起
今後兩使判官罷任後宜一年外與比擬書記支使防

禦團練判官二年外與比擬兩使推巡防禦團練推官
軍事判官等三年後與比擬仍每遇除授量與改轉官
資或職次其有殊常勤績者與議優昇若有文學智術
超邁羣倫或為衆所稱或良知迥舉察驗的實者不拘
年月之限其才器卑低階緣得事者宜量事於州縣中
比擬若州縣官中有文學雄真識畧優深亦量才於班
行及諸道判官比擬任使况諸選人之內多是勤苦立
身每於調集之時皆有等差選限准茲幕吏難使雷同

所貴皆免堙沉遞承驅策

三年正月勅守選之輩例是艱貧合格之時漸多衰老更添雜犯轉見憂嗟方當開泰之期宜軫單平之衆自今後合格選人歷任無違礙者並仰吏部南曹判成如文解差錯不合式樣罪在法解官吏兼貢舉之人辛勤頗甚每年隨計終日食貧須寬獎勸之門俾釋羈棲之歎今年落第舉人所司已納家狀者次年便赴所司就試並免再取文解兼下納文解之時不在拘以三旬但

十月內到者並與收受

二月勅前資朝官及諸道節度觀察判官近勅罷任一
周年後方許求官其出選門官雖准格例送名未定除
官年限自此應出選門官亦宜罷任後周年方許擬議
仍本官自於所司授狀磨勘申送中書門下

九月勅朕大啟四門無遺片善繼有智能之士來陳利
害之言是命擢量貴行酬獎須論條件以定等差應進
策人等若是選人所進策內一件可行與減兩選兩件

減四選三件已上便依資與官如無選可減及所欠選數則少可行事件則多據等級更優與處分如是諸色舉人貢院自考試本業格式不在進策之限如有智謀宏遠文藝優長或一言可以興邦一事可以濟國是為

奇傑難預品量待有獻投旋令擬議

議者以為上封事言減選非也夫言

策畧者必須智見非常所陳殊異大臣之所不及衆智之所不通有益政途謂之策畧今據鄙夫所陳率皆持政常行之事何煩投匭而令人君賞其莠莠賜束帛飲膳可也而遽撓銓線之權啟姦吏賄賂之門深不便也

四年二月中書奏諸道州縣官甚有闕員前資官皆拘

選限其間有朝廷選擇侯伯薦揚得者無多餘難驟進
或病跲於陋巷或老謝於窮途宜開振滯之門雅合推
恩之道今等第減選者一選者無選可減親公事得資
考者宜優與處分不得資考者准格施行兩選三選者
減一選四選五選者減兩選六選七選者減三選八選
九選者減四選十選十一選者減五選十二選者減六
選千牛進馬童子齋郎挽郎宜准元和處分勅旨常調
之中無媒者衆省員之外有關常多方隆達大之規更

顯激揚之理兼先赴南郊行事未授新命及一考前丁
憂州縣官等起今後到闕者宜付所司旋旋磨勘施行
不得輒有停滯大朝恩命廢事規程該定制者各委所
司頒持勅者不拘常例資維新之風教示無黨之震區

初馮道等商議以為常調選人限於格例銓注以至滯
留而州縣吏員多以顏情差攝乃議減選補史杜彼幸
門殊不思九州既未混同十道半違聲教吏員多益州
縣無添是時減選之勅既行議者大以為不可物論沸
騰明年之後有諸色勸進人及山陵行事官兼每年黃
衣選人相計數千皆援減選並合除官所司既無闕員
羣吏只援新勅或論淹滯或訴阿私宰相將至內門則
數百為羣環馬宣訴或言語不遜詰難往來驕吏不能

止後竟追
罷此勅

五月勅諸道馬步判官不得差攝官如交關人須於前
資正官判司簿尉中選性行平允者補授又詔應見任
前資守選官等所有本朝及梁代出身歷任告身並仰
送納委所在磨勘換給公憑只以中興已來官告及近
授文書叙理其諸色陰補子孫如非虛假不計庶嫡並
宜銓錄如實無子孫別立人繼嗣已補得身名者只許
序蔭一人其不合敎使文書限百日内焚毀須絕此後

更敢持合焚毀文書叅選求仕其所犯之人并傳者並當極法應合得資蔭出身人並須依格令施行先是鴻臚卿柳英將齋郎文書賣與同姓人柳居則伏罪大理寺斷當大辟緣赦減死奪官終身不齒故有是詔

是月中書奏准長興元年二月二十一日南郊赦書節文州縣官在任日雪得寃獄許非時叅選超資注官仍賜章服今詳勅命凡云寃獄者所司推鞠定罪不平迴曲作直已成案牘或經長史慮問或是家人訴寃重結

推訊始見情實迴死為生始名雪寃仍須元推官典招
伏情罪本處簡案牘事節給與公憑更於考牒內豎出
候本官滿日便准近勅非時叅選若活得一人超一資
注官二人已上加章服已有章服加簡校官如在任除
雪寃獄外限內徵科了絕減得一選已上或招添戶口
至一分已上並許酬獎如加官至五品以上許奏聽勅
旨如雖雪得寃獄徵科違限不了合殿選者亦待殿選
滿日與敘雪寃之賞或逃却戶口亦據降等敘官如本

司小小刑獄未經別司縱能處斷不得援例從之

愍帝應順元年閏正月中書門下言以天成二年十二月詔曰長定格應文學出身人一任三考許入下縣令下州縣錄事叅軍亦入中下州錄事叅軍兩任四考許入中下縣令中州錄事叅軍兩任五考許入中縣令上州錄事叅軍兩任六考許入上縣令及繁州錄事叅軍凡為進取皆有因依或少年便授好官或暮齒不離卑任况孤平舉士纔年四十始得經學及第八年合選方

受一官於初任之中多不成三考第二選漸而蹉跎有
一生終不至令錄者若無改革何以發揚自此經學出
身請一任兩考許入中下縣令下州錄事叅軍詔曰叅
選之徒艱辛不一發身遲滯到老卑低宜優未達之倫
顯示惟新之澤其經學出身一任兩考元勅入中下縣
令下州錄事叅軍起今後更許入下縣令中州下州錄
事叅軍一任三考者於人戶多處州縣如於近勅條內
資叙無當者即准格循資考入官其兩任四考者准三

任五考例入官餘准格條處分不得起折

是月詔吏部三銓南北曹禮部貢院注擬考試依格疾速發遣勿令虛有滯留

末帝清泰元年五月詔曰應勸進諸選人前京兆府武功縣令龐濤以下四百九十有四人方在京都遽茲際會既自勸進宜示獎酬其前資州縣官及黃衣選人近日緣少闕員難於減選候合格日各超一資注擬行事官亦於注官時優與處分長流人已歸本貫即以勅書

節文處分攝試官推巡令錄宜許比三傳出身判司衙
推主簿比明經出身各守選限自今年始合格日與初
官宗子未有出身者與出身有出身者同選人例處分
給與憑據

七月詔應徽陵行事官各無遺闕已議獎酬比少闕員
難於減選遂許合赴集日各與超資今又懇有披論宜
特與減一選其今年合格者便委南曹磨勘送銓注擬
來年合選者勒赴冬集所司磨勘無遺闕旋旋送銓免

取文解其去冬判成未得官者宜先注擬應前任正授
賓從亦宜減一年無年可減使與擬授先有長興四年
三月二十二日勅普與減選今為員闕數少並住施行
其攝官職并御署人等並以元勅處分

八月詔應自鳳翔及沿路迎接隨從到京州縣等官或
昔經患難罄竭忠勞或遠奉乘輿馳扈從既各憑其
銜署遂溥降於優恩爰示等差特行釐革所有自振武
西京河中鳳翔已前銜署員僚或因無員闕權且補差

或託彼薦論偶經任使不可悉謀援例便望授官將堦
僥倖之源須立區分之限自八月三日後應所稱銜署
官員除內有處分特行恩澤外其餘稱銜署並許逐攝
同一任正官依期限赴選不得更令進狀及與施行

九月吏部三銓言所用循資格先經詳定然自次府司
錄叅軍已下無品第八官處尋帖格式叅詳添入又以
地卑不敢添注請差官詳議詔委元詳定格式官刑部
員外郎孔莊大理少卿李延範殿中侍御史韋稅等議

詳

十月中書侍郎平章事姚顛上言近宰臣盧文紀上章請條理選部臣聞事不師古匪說攸聞又曰仍舊貫何必改作此先正之格言也臣案六典吏部三銓尚書侍郎分典選部其格擇人有三實四才孟冬三旬集人有地理之差若循彼綱條依其格限人無濫進官得實才只自天成四年十月詔罷侍郎分銓只以尚書併領正官又闕多是他曹權差才力或有短少遂致發遣凝滯

團集遲留移省既失常規選人隔年披訴臣請却依六
典分銓朝廷列職分司比期釐務置之閒地可表分優
望各委典銓於事為宜詔曰姚顛所奏銓管實合規程
不唯六典昭彰抑亦三銓整肅而長定格是聖朝重定
條件甚精若令千載以無隳必使萬方而有則俾其復
舊深洽羣情如聞循資格行用年深事條差舛必須詳
正方免弊訛其分銓事宜依循資格宜令吏部三銓尚
書郎南北曹給事中叅詳其間條件如其舛誤即釐革

以聞

二年二月中書門下奏近日除官制未下多漏泄於外此後除改候盡下所司以正勅寫告進納如畫黃未下請不催索詔曰節度防禦團練使刺史行軍副使等事關急切除授官告若待畫下給即留滯勒樞密院凡經由處不得漏泄其尋常除命從之

三月工部尚書判吏部尚書銓崔居儉奏今年選人內八十三人無闕注擬詞訴紛紜蓋因近勅減選人仕者

多門雖可區分難抑詞理請下格式取四月後合用員
闕發遣中書門下奏先以銓曹論員闕遂却置戶掾一
員諸州一百五十員格式元送闕簿六百四十餘處後
又許超折資序又堂帖令畿赤已上雖擬議許開銓後
除授不合預請用四月後員闕望於移省限內並須了
絕不得更令選人有詞詔曰宜令從四月一日後至六

月終員闕施行餘依中書所奏

崔居儉多藝有士望是時帝起義時諸攀附入

官者衆皆付銓三銓難其事故盧文紀奏用居儉與察其綜覈之失而近侍者素知其意而奏之故不從所奏

四月宰臣張廷節秦州縣官徵科賞罰列縣令錄事叅
軍正官一年依限徵科了絕加階二年依限與試銜三
年總及限與服色如攝令錄一年內了絕仍攝二年三
年內總及限與真命內主簿一年二年如縣令條三年
總了別任使本判官一年加階二年改試銜三年轉官
本曹官省限內了絕與試銜轉官諸節級三年內總了
絕者與賞錢三十千其責罰依天成四年五月五日勅
從之

是月中書門下以吏部三銓注擬大違條格帖門下省
詰錄事強知謙云天成三年已前許超折一資至兩資
或三資者不過三兩人天成三年後不許超折今銓注
擬選人有自超一資至五資亦有三兩人超六資七資
八資者中書奏自有選門只憑定格儻或踰越便舉條
章亦有事繫從權理難固執先開容許後守條流所貴
時暫施行免令臆紊今三銓所注選人超折太多從來
固不容許若重議改移便成淹滯今年且據所注押定

將來別正條格從之

七月中書門下言自今年二月後諸州奏軍州判官九
人之擬新詳定勅文慮在外未知詔軍事判官宜令
本州刺史自選擇舉奏初且除本職未得與官或與刺
史連任相隨顯有勞能許本刺史以聞量事獎賞仍不
許橫有奏薦其二月後九人且與施行

是月御史中丞盧損言臣等先編聯制勅外有比非故
實不便於時條件准天成元年七月及四年十一月勅

應中外官除授不計品秩一例宣賜告身請依舊制合
賜外各令自出綾紙又天成元年七月勅除授旨授令
錄皆令內殿辭謝臣等以令錄卑微不可內庭展謝請
依舊制正衙辭謝又天成三年五月長興二年七月勅
許節度使帶使相歲薦五人餘薦三人防禦團練使二
人臣惟州縣員闕甚少若容薦舉則每年銓選何以注
擬請特行釐革又長興二年八月勅州縣簿尉判司差
充軍判官仍同一任自爾已來頗傷物論以為不當請

行止絕依舊令衙前選任詔曰令錄之任總六曹之紀
轄係百里之慘舒惠養吾民可以親承顧問內殿辭謝
可如舊制藩侯郡守薦人或諳公事或有裨益不可全
阻許依天成勅帶使相藩臣歲薦三人餘二人直屬京
州羣防禦團練一人諸色官誥舉人春闕冬集綾紙聞
喜闕宴所賜錢並仍舊官給餘從之

八月中書條理前資朝官大卿監五品升朝官西班將
軍皆在任許滿二十五月如衝替已經二十月即別任

用少卿監舊制三任四任方入太卿監今後祇三任皆有限滿無殿責者如是特恩不在此限五品升朝官舊例三任四任方入少卿監今後祇三任須逐任月限滿無殿責若特恩不拘此例西班牙將軍罷任後一年許求官舊例三任四任方入大將軍今祇以三任為限並須逐任滿月限無殿責或曾任金吾將軍刺史與上位比擬非此類或少年並居下位仍不得曾有殿責者特恩不拘此例三任大將軍方入上將軍並須每任滿月限

無殿責者若曾領藩鎮任御史特勅不拘此例今後朝廷只除兩使判官其書記以下任藩府自辟朝應朝官除外職任無限者罷任後須守舊勅一年月限方許陳乞如未曾昇朝便居諸道賓從府罷或舊使未有所授特有表薦若簡校官是臺省三院之御即與中下縣令檢校是大夫中丞秘書少監郎中員外郎與請資初任昇朝官如檢校官是尚書常侍秘書監左右庶子昇朝便與少卿監諸道賓從依州縣官例在任三十月限或

罷官猶有一年之限或是衝替丁憂而罷已及二十月者並須更守前官滿月限方許陳乞諸州防禦團練刺史判官推官並請本州自辟請中書不得除授合出選門官帶三院御史供奉裏行及省銜者罷任後一周年許陳乞諸州別駕資品高不除令錄仍守本官月限亦得替後一年方許乞官其長史司馬或因攝奏正比來未有官者並送名從之

十月中書門下奏長興二年四月五日詔朝臣居喪終

制委御史臺具名申奏諸道賓從喪後宜行恩命州縣
官纔授官及到任一考前丁憂服闋並與除授依長定
格自有節文應州縣官新授及到任一考後丁憂服闋
准格取文解南曹納磨勘由中書門下當與除擬不得
經堂陳乞從之

三年四月詔曰近以內外臣僚出入迭處稍均勞逸免
滯轉遷應兩使判官畿赤令長取郎中員外補闕拾遺
三丞五博少列官僚選擇擢任一則俾藩方侯伯別耀

賓階次則致朝列人臣備諳時政今後內有已滿闕月
限外或偶是缺員宜便依此施行

晉高祖天福二年正月勅應京畿及諸州縣舊有唐朝
諸帝陵并直源縣並不為次赤却以畿甸緊望為定其
逐縣令不以陵臺結銜考滿日仍以出選門官例指揮
隔任後據資品准格例施行

二月勅應諸道前任行軍副使等例從替罷久住京師
每念滯淹常懷惻憫極欲疾速發遣穩便安排但以擬

除一人須俟一缺授命者纔去得替者便來到闕既專望渥恩在任又須終月限循環不已積滯轉多而況在京所費亦倍必想在外一年事力纔充在京數月支持比候闕員多稱委困當別行於條貫期各守於規程起今前件官員等如得替後且就家私穩便安居限一年後方得赴闕朝廷當據職資便與比擬或非時有闕與就便安排自然公私得濟出處合宜有員闕以安排無歲時之停滯事闕悠久情在優矜各委遵承勿得踰越

其先得替在京者宜令中書據見有員闕處量材安排
仍降勅諸道各令知委

四月勅應諸道前資州縣令官等明廷選士歷代通規
各係職司共將掄擬顯有去留之式明分真濫之源今
者州縣前資官員悉於中書陳狀來事却慮虛陳銓管
永無常調之人並在鼎司難遏躁求之跡去歲以國朝
創業州縣缺官思廣渥恩是從優異今則彛倫攸敘庶
政咸修宜舉規程俾無侵越其今日已前在中書陳狀

諸色人等見點簡引驗如不欠少出身立任文書及無
踰濫者旋具奏擬宜令今日後諸道前資州縣官等若
是資考已出選門及一任除官未入選門并一考前丁
憂及活得寃獄者准元勅年限滿日許經中書陳狀當
與簡勘事理施行此外須令並依前後勅格程限赴吏
部叅選或有公材出衆政績異常者臨時超擢不在此
限

五月前守汴州浚儀縣主簿何光又進策二其一曰竊

見諸處邊郡小縣多是山鄉雖舊有勅正官滿時不許
差攝充替無那遠地多越明規攝官既已到來見任豈
敢違拒况聞所差攝者大半是本州府使長臨時與旋
署虛銜強替見任正授官員其最不可者頗有當年之
內或兩度三度替移來者須逆去者須送配從門內率
自鄉中悉是權行誠非本分如斯得倖豈肯力官非惟
素公當且害物自今後伏乞特行明勅顯自新朝其邊
郡縣官仰節度刺史或有見任因事停罷即許差曾入

仕者權令撫綏仍又須候正官到官不可以攝替攝官
或經半載或過一年如能志遠脂膏道著清白招添得
戶口徵督得賦租百里傳聲羣黎咸惠衆狀舉請即仰
奏聞特乞大朝便行真命如此則皇王恩遠赤子幸深
免被煩苛漸期蘇息勅曰今後正官滿日宜令逐處長
吏准元勅預前奏聞必在審擇能官不得朝差暮替如
顯有過犯不在此限仍令曉示諸道其二曰切見諸道
選人合格下解不出十月立定三旬此則常程向來舊

制却是或有因解樣所誤式例稍虧字內點畫叅差印處高下訛舛便乃駁犯致有艱難其如有七年八年選期千里萬里途路羈窮取士辛苦到京若粟錯不容乃滯塞無計自今後伏乞特行明勅顯布新規其黃衣選人只驗出身文書已有前任者據考牒及解繇歷子轉年得盡合格不虛便與判行小小不賜駁犯則天下感明時事易聖主恩寬不使吏徒得行奸計者勅曰叅選之日考驗之間稍容易則必長奸欺若艱難則或成淹

滯今後宜令所司點簡文書如有粟錯詳酌事理非藏
奸隱倖者不要駁放

九月吏部銓奏長興四年五月五日勅應諸道州府都
虞候司判官先指揮令於州縣前資之中簿尉判司之
內選差勾當二年行有廉謹理無黨偏即委本道奏聞
請行酬獎者近日馬步判司多是差攝官充馬步判官
奏薦須於前資正官判司簿尉中精選明練公法性行
端正者方可任使滿二周年後無遺闕者與減三選仍

委本道州府一例給與公憑如只欠三選已下者仍便
給與文解赴選今日已前有前資正官充馬步判官並
准此所有諸道州府應今日已前已差攝試官充馬步
判官勾當已及三年無遺闕者亦宜令本州府給與公
憑仍便申奏更四年後給與文解赴選比擬初官其今
日已前攝試官見充職有過一周年者宜令待滿二年
日准上處分如未及一周年者宜令逐道州府勅到後
便差別前資正官停替不在給與公憑者偽清泰二年

三月二十四日勅停廢前資攝正官充馬步判官前件
勅已經封鎖不行者勅偽清泰二年三月已前諸道州
府所差馬步判官有勤績者宜令並准元勅赴吏部叅
選不得更經中書陳狀十月勅選人試判兩道

三年正月勅舉選之流辛苦備歷或則耽書歲久或則
守事年深小有違碍格條例是不知式樣今則方求公
罷宜被皇恩所有選人等宜各令所司除元駁放及落
下事由外無違碍並與施行仍令所司徧下諸道起今

後文解差錯過在發解州府官吏

八月勅御署官員等自前並於中書陳狀引驗文牒擬
官承乏之官從權所任例逢興運咸被異恩其間慮有
曾立事功或未親官業宜稍分於殿最將審驗於行藏
免與濫進之譏用副當仁之選其御署官員宜令今後
於銓司投狀銓司追引點簡歷任文書分明者申送中
書門下以憑旋據選人御署因由奏擬

十二月勅以唐長興四年四月五日節文應州縣官纔

授新命及到任一考前丁憂服闋日亦並與除官者此
後應一考前丁憂州縣官等服闋後准格便合赴選自
因唐朝勅命送至中書除官自今後宜令吏部准格指
揮仍赴所司

五年三月詔吏部三銓聽四時選擬官旋奏不在團甲
之限

十月詔曰過格選人等早列官途合依選限或值戈鋌
之隔越或緣貧病以淹延既礙舊條永為廢物適當闔

創宜閔湮沈可赴吏部南曹准格召保是正身者與降
資注官

冊府元龜卷六百三十三